



Der vorgesezten baucheten seulen mach ein solichs captel. Ersilich mach das so hoch vnd dick als die seulen oben vnder der fasen dick ist. Darnach reiß die gefirt blatten oben darvon vnd mach sie eins sechs teyls dick von des captels hoch/vñ lad sie halb so weit auß als dz captel dick ist. Darnach teyl sechs gleyche felt zwischen der blatten / vñ vnden des captels ende / vnd schneid diser sechs teyl eins ab / mach darauß ein gestalt einer flachen schüssel / jr übers endt lad auß bis ins halbtteyl der blaten vberschuß / vñ mach jr ein fasen eins vierteyls breyt von der blatten dicken. Darnach mach vnder der schüssel ein fasen eins dryteyls minder dick dan die ober fasen ist / dise fasen lad eins funfteyls weit auß von der blaten vberschuß / vñ von diser fasen zeuch hinein ein holkelen bis an des captels dicke so wirdt ein firm darauß wie ein weiter hofpecher / vñ die schüssel die darauf stet machen miteinander ein guten firm. Darnach magst du das captel ziren mit blumenn thieren oder anderen dingen nach deinem gefallen. So du die zirdē vnder die vier ort der blattē machen wild die magst du herab rucken das sie sich vnder der fasen des bechers oberwerffen / die firung darzu machen / so dick als die blatten ist / vnd lad sie auß zweyer funfteyl weyt von der blatten vberschuß. Darnach magst du d schüssel form auch mit etwar ziren / vnd vnder den orten der blatten zwischen dem oberworffen laub magstu auch etwas von zirden machen. Item wöllen dir die örter der blatten zu weyt vberschiessen / so reiß jr hölen mit dem zirkel tieffer hinein / vnd schneid jr eck so kurz ab als du sie haben wild / wie ich solichs hernach hab aufgerissen.



Nachfolget will ich ein andre runde seulen leren machen / die soll gewunden vnd gekrümpet werden / einer sinderē art / die mag man zu einer zird brauchē / vñ zu gedechtnuß ein bild dar auf stellen / die mach also. So dick die seul ist / ob jrer aufgeladenen fasen vnd holkelen / der sel ben teyl mach sie neune hoch bis an jre holkelen fasen vnd reiß vnder dem captel / vnd mach sie oben ein sechs teyl dünner dann vnden / vnd zeuch die seulen mit geraden linien zusamen / vnd der ring auf der seulen / dryt mit seim ent so weyt herauß / als die seülen vnden dick ist / vnd so hoch erhaben so weyt die vbertrettung / dise höhe der zird teyl mit zweyen zwerch linien in drey gleyche felt / in dem obersten beleybt der stab oder ring / im anderen die fasen / die endet mit jrem vberschuß im mittel zwischen dem

S